

Malaysia negara pertama benar pemindahan kredit MOOCs

Putrajaya: Malaysia akan menjadi negara pertama di dunia yang mengiktiraf dan membenarkan pemindahan kredit bagi Kursus Atas Talian Terbuka Secara Besar-Besaran (MOOCs), yang membolehkan pelajar mengikuti pengajian di beberapa institusi pengajian tinggi (IPT) secara atas talian.

Menerusi pendekatan itu, pelajar akan memperoleh kredit selepas tamat setiap kursus yang didaftarkan di bawah platform MOOCs dan kredit itu boleh dipindahkan untuk tujuan penganugerahan sijil, diploma dan ijazah, berbanding IPT di negara lain ketika ini yang hanya menawarkan pembelajaran kursus tanpa memberikan kredit.

Inisiatif pengkreditan MOOCs akan menjadikan pendidikan tinggi Malaysia lebih fleksibel dan terbuka serta mampu menarik lebih ramai pelajar Malaysia dan dari seluruh dunia”

Idris Jusoh,
Menteri Pendidikan Tinggi

Menteri Pendidikan Tinggi, Datuk Seri Idris Jusoh, berkata pengkreditan MOOCs adalah sebahagian daripada pendekatan pendidikan fleksibel yang akan diterokai dan dilaksanakan kementeriannya secara terancang, menyeluruh dan strategik, mulai tahun ini.

Beri mandat kepada MQA

Katanya, Agensi Kelayakan Malaysia (MQA) diberi mandat untuk melaksanakan inisiatif itu yang membolehkan semua kursus MOOCs dari Malaysia dan luar negara didaftarkan di bawah platform MOOCs Malaysia.

“Dasar ini akan menjadi dasar utama pendidikan tinggi negara. Inisiatif pengkreditan MOOCs akan menjadikan pendidikan tinggi Malaysia lebih fleksibel dan terbuka serta mampu menarik lebih ramai pelajar Malaysia dan dari seluruh dunia,” katanya ketika berucap pada majlis Amanat Tahun Baharu 2016 di sini, semalam.

Yang turut hadir, timbalannya, Datuk Mary Yap Kain Ching dan Ketua Setiausaha kementerian, Datuk Seri Dr Zaini Ujang.

Idris berkata, di bawah pendekatan pendidikan fleksibel itu, MQA akan memperluaskan pelaksanaan program Akreditasi Pengalaman Pembelajaran Berasaskan Pengalaman Terdahulu (APEL) bagi tujuan penganugerahan kredit daripada pengalaman kerja dan akan dikenali sebagai APEL (C).

Selain itu, katanya, program Dua Universiti + Dua Industri (2u2i) akan mula dilaksanakan tahun ini bagi memberi peluang kepada pelajar belajar sambil bekerja.

“Universiti Malaysia Kelantan (UMK) dan Universiti Putra Malaysia (UPM) akan menawarkan program 2u2i pada tahun ini. Pelajar akan belajar selama dua tahun dan kemudian menimba pengalaman industri selama dua tahun,” katanya.